

PREDGOVOR

Ideja za pokretanje časopisa "Bosniaca" proistekla je, u najvećoj mjeri, iz činjenice da je Nacionalna i univerzitetska biblioteka Bosne i Hercegovine razorena u artiljerijskom granatiranju 25/26 avgusta 1992. godine i iz nužnosti njene obnove.

Isto tako, članovima 30.-48 Zakona o bibliotečkoj djelatnosti (Sl. list Republike Bosne i Hercegovine, IV br. 37. od 2. oktobra/listopada 1995. godine), jasno su navedene obaveze ove Institucije da prikuplja obavezni primjerak štampane i na druge načine umnožene bibliotečke građe, radi njenog čuvanja i davanja na korištenje zainteresiranim korisnicima. U tome odgovornom i neizbježnom poslu, značajno mjesto dato je Bosniaci, odnosno građi sa teritorije Republike BiH, bibliotečkoj građi koja se odnosi na Republiku BiH, te djela bosanskohercegovačkih autora objavljena u Republici i izvan nje i strana djela koja se odnose na našu Republiku. Ovom je zadaćom obuhvaćena je rijetka i stara knjiga, te službena puglikacije, važno mjesto između ostalog dato je i radu na tekućoj i retrospektivnoj bibliografiji Bosne i Hercegovine.

U složenom poslu obnove jedne biblioteke kakva je naša, sigurno, posebno mjesto ima intelektualna i informacijska infrastruktura, koja bi pratila čitav taj složeni poduhvat.

Podršku ovome poduhvatu dale su i kolege bibliotekari iz inostranstva na posebnoj konferenciji, održanoj u glavnom gradu Republike Češke, Pragu, 25.-26. novembra mjeseca 1994. godine. Tamo je, uz saglasnost svih prisutnih, preporučeno da se sa poslom obnove počne odmah i da se rekonstituiru kolekcija Bosniace u okviru Nacionalne i univerzitetske biblioteke Bosne i Hercegovine uz asistenciju UNESCO-a.

Pri tome je posebno naglašeno da se radi o dokumentarnoj građi relevantnoj za teritoriju Bosne i Hercegovine u njenom historijskom okviru, bez obzira na jezike na kojima je pisana ili publikovana.

U obnovi kolekcija NUB BiH, posebnu važnost ima rekonstrukcija kataloga i izrada lista deziderata kao i rad na izradi tekuće i retrospektivne bibliografije Bosne i Hercegovine.

Koristan prilog ovome poslu bilo je i stručno savjetovanje posvećeno Bibliografiji Bosne i Hercegovine, održano u Sarajevu početkom novembra 1995. godine i izložba bibliografske literature u Galeriji "Paleta", prikazana tim povodom.

Upravo radovi priloženi i pročitani na ovome Savjetovanju, predstavljaju glavninu materijala koji publikujemo u ovom tematskom broju časopisa "Bosniaca", koji time počinje svoj život.